

湘

軍

記

湘軍記卷十五

東湖王定安撰

平滇篇

雲南古滇國，其地外接越南，暹羅，南掌，緬甸。境內則種族繁多，自宋以前不隸中夏。元明始入版圖。元之興也，先定西域，故於回部最曠。諸行省必以回回一人參知政事。陝甘遼陽嶺北雲南等省，例設回回，豫史，通事，知印若干人。中國回族之盛自此始。回之爲教，崇事祆神。其朝天房，謁教祖墓，往往不辭萬里，躬詣禮拜。天房者，墨克也。在雲南。

西八千里陸行自維西出前藏水則自永昌出緬甸航海  
道印度卽至其國漢條支地也中土回民其傑者往往潛  
出雲南至西域朝天房於墨克謁祖師墓於默狄那雲南  
回族之多殆由於此然回人居中國雖歷世久猶循其國  
俗與漢民異禮漢民之弊喜侵侮外人相愚詐自詡牧令  
狃故習輒以偏袒漢民爲盡職外人詬無所訴則發憤叫  
呶怒目操白刃相殘殺其意以爲吾尋仇報復非反

朝廷也至於焚掠無已戕官據城雖欲不爲亂民不可得  
矣故苗番羌夷之禍率如此而雲南陝甘回亂其尤深且

鉅者也當回之叛滇省姦民揭竿四起又有土酋野賀儂  
獮羅夷乘機縱掠而貴州廣西羣盜縱橫其地多與滇鄰  
南徼五千里霾晦不見天日當是時

天子方憂中原不暇問荒遠大吏坐困無術則聽將領料  
民爲兵就地徵餉於是騎將悍弁習爲跋扈生殺由己威  
福自專地方文武不敢誰何疆吏稍裁抑之輒擁眾爲變  
滇事益不可問矣滇亂之興肇於咸豐五年其初臨安悍  
回與漢民私鬪相殺各召其黨爲助遠近旁回聞風響應  
於是馬金保藍平貴起姚州杜文秀起蒙化提督文祥攻

姚州不克杜文秀乘虛陷大理踞之杜文秀者故永昌爨  
潛匿蒙化之大小圍埂圍埂煙戶萬餘村寨二十有八其  
民回多漢少承平時回人恃兇橫行由來已久文秀之反  
也圍埂回首糾萬人助之自下關襲破大理城永平雲南  
賓川回聞大理臨安之變相率殺漢民據城堡賓居回亦  
四出剽掠提督褚克昌圍賓居敗死六年馬世德據館驛  
館驛在臨安通海之交故有土城曲江巡檢駐地也館驛  
旣陷婁公東溝田心及邱北之曰者鄉彌勒之竹園皆殺  
漢民相應而馬和馬貴等據澂江略旁近邑呈貢晉甯宜

良江川諸城皆陷。迤西南驟然無甯土矣。是時雲貴總督  
恆春督師貴州。聞亂則引軍還滇。攻迤西諸回。久持不下。  
七年閏五月。激江曲江回犯省城。燒城外廬舍殆盡。恆春  
登陴望見火光。則大憤懣急率親兵開城赴敵。羣僚諫止  
之。其夫人博禹特氏責恆春曰。今賊所燒殺者。皆公赤子  
也。公爲大吏坐視其死而不救。何以對百姓。

朝廷譴責至矣。恆春憂懼不知所出。與博禹特氏同縊於  
署。比回退圍解。士民悲悼之。十月。回匪蔡七二陷雲州。知  
州吳景蘇會副將魁昌攻之。大理蒙化回來援。吳景蘇敗

死八年回匪馬標陷威遠廳田四濫起他郎緬甯間據新撫蔡七二陷順甯馬標田四濫皆杜文秀黨蔡七二則文秀姍姪也於是迤南道梗九年回匪陷鎮南永北鶴慶鄧川

詔授按察使徐之銘爲巡撫之銘至滇才一年遽有此擢時事局日壞之銘荒淫廢事滇民頗失望總督張亮基屢引疾乞罷十年

詔劉源灝爲雲貴總督未至以徐之銘兼權之蔡七二陷緬甯副將魁昌死之初魁昌因援絕糧匱乞救於耿馬土

司罕恩澤資之兵餉會恩澤爲族人所戕魁昌率飢軍城  
守自正月至閏三月城裂二十八處皆堵合之而姦民內  
應城陷負其母投井死並其妻子殉焉緬甯旣破蔡七二  
遂屠永昌陷騰越與杜文秀益相犄角矣十一年布政使  
鄧爾恆擢陝西巡撫將發革將何有保豔其輜重嗾其黨  
戴玉堂劫殺之以爭贓貨玉堂復刺殺有保徐之銘不能  
問物議大譁以爲皆之銘所使也時滇事益糜爛劉源灝  
久不至

詔福濟爲總督福濟亦遷延不行乃以潘鐸代之且查陝

撫被殺事鐸自川入滇奏論鄧爾恆之死實由何有保此  
外並無主謀請將何有保戴玉堂戮屍其黨史潔劉紹武  
梟示之銘疏於防範交部議處

詔允之

同治元年八月粵賊石達開自貴州分掠平彝鎮雄潘鐸  
遣將禦之達開還走川黔

詔張亮基赴雲南督軍兼權提督潘鐸徐之銘合疏促亮  
基駐東川昭通防石寇

二年正月回弁馬榮率數千人入省城屯五華山五華山

城中最高地也。道路洶洶皆言榮反。榮夙爲總督所信。總督終以榮不負己。榮亦不忍於總督。未敢發。壬辰潘鐸詣五華書院開喻之。令移屯城外。榮已諾矣。方登輿。榮揖送其黨以矛旁刺鐸。榮卽起持鐸刺者復至。鐸竟薨。居民驚亂。時岑毓英權布政使。聞變持短兵巷戰。榮走南門大街。招回黨絡繹入城。毓英策城大難置守。乃塞藩司署門。率親兵千人晝夜堵禦。回來則憑垣發礮。或開門縱擊。賊皆靡。榮懼外援且至。遺書巡撫請和。徐之銘微服詣毓英。言其狀。前臬司花詠春糧道張同壽鹽道宋延春皆至。毓英

語於眾曰今賊雖入城吾當死戰破之如其不勝公等與  
毓英閤署自焚未晚也於是飲血誓師分兵守東南門用  
閒離其黨而陰使使召馬如龍入援如龍初聞省城陷以  
爲院司戕矣比知毓英守藩署未失還軍馳入省諸紳民  
率圍兵至二月丁丑朔合軍擊馬榮於城內大破之回眾  
走城外猶留屯弗去毓英患之召部將李維述計誅馬榮  
悍將悍將夙暱維述號爲兄弟一日天嚮明維述率千人  
往入其壁悍將方沐問所來維述曰奉上官檄討夷人不  
識路徑故來問耳悍將指畫示之維述從其背搜刀擊殺

呼於營曰爲兵者出前門從賊者出後門羣回驚散省城危而復安事聞

詔以勞崇光爲總督徐之銘逮京議罪賈洪詔爲巡撫之銘聞

命將行紳民環而留之曰今回情洶沸新任督撫未能卽來幸舊帥在猶可繫人心號召忠義若公遽去則滇民以爲見棄於

朝廷禍更不可問矣之銘乃止勞崇光前罷兩廣總督奉詔入黔及被

新命不敢言衰病毅然赴任石達開自昭通走威甯賴裕  
新走甯遠四月崇光行次綏陽與石黨遇避入民寨檄楚  
軍之在黔者合鄉團奮擊破之斬五千餘人達開已誅於  
蜀其黨李復猷欲結銅仁教匪犯楚

詔崇光與黔撫張亮基備之當是時崇光駐黔賈洪詔駐  
川皆阻賊不能進滇中兵事倚岑毓英一人

朝廷益嚮用楚軍

三年二月授劉嶽昭雲南按察使嶽昭隨駱秉章轉戰鄂  
蜀調援陝西所向有功是時留屯四川防守勞崇光以廻

西杜酋猖獗岑毓英分守楚雄各隘防其東逸毓英進  
兵迤東攻曲靖馬龍雷益諸城皆下之俘斬馬連陞馬榮  
剖榮戶祭潘鐸兵民稱快於是迤東稍靖崇光進駐平彝  
四年春擢劉嶽昭雲南布政使乃議自川援黔以入滇五  
月嶽昭克貴州正安

五年二月嶽昭克綏陽收降眾千二百人隸爲兵合舊部  
七千人先是賈洪詔以逗留罷林鴻年代之仍屯川境不  
敢進乃授劉嶽昭雲南巡撫率所部轉戰以往勞崇光進  
駐省城奏以署提督馬如龍專廻西軍事圖杜酋又以貴

州猪拱箐匪巢貽害三省奏令岑毓英出境討之規通餉道十二月猪拱箐匪犯鎮雄毓英自昭通赴援連破之新營柳林

六年正月滇軍克畢節之茶山二月進攻猪拱箐毀苗敎一百餘寨毓英逼山而壘獄昭遣宋華美擊苗匪於蔡板爲滇軍聲援是月雲貴總督勞崇光薨以張凱嵩繼之未至臬司宋延春暫攝其任

詔促嶽昭先清川黔邊境率師入滇先是

上以滇亂久郡縣多陸沈命勞崇光繪圖進兵燹後文獻

蕩然崇光依通志晨夕揣摩圖未上而卒獄昭專疏呈獻  
是時渝陷府城四曰大理杜文秀踞之曰麗江姚得勝踞  
之曰永昌楊德明馬國春等踞之曰順甯馬德征踞之州  
九曰鎮雄曰姚曰趙曰賓川曰鄧川曰雲龍曰鶴慶曰劍  
川曰雲廳七曰騰越曰蒙化曰永北曰緬甯曰龍陵曰彌  
度曰普淜縣三曰雲南曰浪穹曰永平而太和順甯麗江  
保山之附府者不計焉其他村堡市鎮不可勝數其首軼  
興軼衰無常號六月岑毓英克猪拱等七月克海馬姑獄  
昭推功於勞崇光令毓英回師曲靖初崇光檄馬如龍攻

姚州鎮南獲勝杜文秀遣死黨奔救如龍部將合國安楊  
盛宗退守大姚軍中患疫如龍回省養疾獄昭知如龍毓  
英不相能故令毓英駐曲靖避之八月迤西回陷定遠大  
姚祿豐廣通元謀省城戒嚴毓英遣劉重慶等率二千人  
援省城呂鎮南等二千人援楚雄楊國發等二千人攻廣  
通分賊勢周之珪等三千人道省城攻祿豐以衛富民羅  
次柳明泰千人守武定祿勸於是省防稍固獄昭臚陳四  
事其略曰滇省營制久廢勦賊用濫練其多少去來無定  
數強者爲練頭或保至協鎮或自帶頂翎文員不敢過問

稍拂其欲則戕官劫署與賊無異卽如未議西征以前杜逆伏而不動省會粗安西征未久而逆燄愈張練勇節節退避不戰而潰今欲勦西逆而仍執以回攻回之說誠恐授人以柄操縱隨之此兵事之難也滇省全資外餉軍興十餘年積欠數百萬部撥之款外省以空文了事而省城軍需釐金等局應歸司道經理者回人鎮將濫廁其中盤踞援引支銷冒濫甚至州縣之錢糧井地之課稅亦由回弁往收按戶派捐弊難枚舉臣前飭岑毓英將東路釐稅州縣錢糧照例由該司綜核原欲逐漸轉移尙不滿營員

之望此餉事之難也滇省漢回猜忌兵連禍結更有可漢可回忽彼忽此者挑釁生非就中取利或居衣冠之列而懷叵測之心跡在疑似之間患伏蕭牆之內官軍千艱萬苦每敗於奸軍之一言此防內患之難也滇省劇寇首在大理順甯年深地險我軍進剿每苦無糧兼之文武不和號令歧出是欲勝人而先有取敗之道欲攘外尙多內變之憂此謀進取之難也現在新陷之區自當相機攻取一俟附省一帶事有把握然後鼓行而西進圖杜逆庶可收得寸得尺之效不致蹈半途而廢之譏十一月辛未迤西

回陷羅次壬申陷楚雄嶽昭調遵義防軍赴援

詔曰張凱嵩前奏暫駐東昭先勦迤西此時情形萬緊該督應先入省城著卽募齊勇丁審機前進岑毓英已撥兵援應應否馳回省垣劉嶽昭宋延春妥商辦理

七年正月迤西回分犯富民安甯昆陽新興呈貢易門皆陷之二月岑毓英自將援省城道宜良七甸進兵破回寨三十餘嶽昭遣李家福屯曲靖三月嶽昭進駐曲靖奏言西逆占踞郡縣已數十處之多官軍初未進攻賊亦伏而不動勞崇光入滇後與馬如龍計議西征旋因糧餉奇窮

未能得手現在附省州縣多爲賊陷省城被圍岑毓英所部餉需支絀倘仍無力支持大局不堪設想上年張凱嵩請寬籌滇餉奉

旨於浙江等省關月撥銀二十萬倘能如數解滇亦可稍紓眉急無如有撥無解視作具文當茲萬分喫緊惟有籲催各省關協餉並飭部臣再指有著之款二十萬兩庶軍心先可稍安全軍不致立覆

詔如所請張凱嵩病免以嶽昭爲雲貴總督毓英爲雲南巡撫宋延春爲布政使時回勢披猖號三十萬環省城西

南北賊壘延袤十餘里。省東之江右館石虎崗亦立卡碉。厚回馬添順踞尋甸城與相應。且欲窺東川曲靖。獄昭遣謝景春等進露益。王維金等扼馬龍。調臨元騰越兩鎮兵由南路攻晉甯綴賊。貸四川軍火濟城內守軍。護總督宋延春率兵民晝夜登陴。回弁合國安謀內應。馬如龍斬以徇。毓英屯響水。閻親攻楊林。楚軍將李家福方自馬龍攻尋甸。聞滇軍有事。楊林移師會之。燒其木壘。破回寨六碉樓三。於是甸尾古城廠口皆下。糧路始通。毓英與李家福皆受傷養病。而參將楊玉科已繞四川會理。攻武定。元謀。

大姚祿勸定遠白井易門皆克之圍城人心稍定四月尋  
甸匪陷功山防營昭通鎮楊盛宗敗走嶽昭令全祖凱赴  
東川助防奏擢李家福爲昭通總兵李維述岑毓英克回  
寨三閏四月攻石虎岡古佛寺賣米市盡拔之何秀林等  
破賊於呈貢杜文秀聞官軍屢捷遣悍黨數萬出賓川北  
援馬如龍分部兵二千禦之武定附省回久閉壘不戰突  
出奪大虹山築二壘如龍親擊之破其一壘五月劉嶽昭  
奏言滇亂一日不平卽川防一日難撤請令提督胡中和  
率川軍援滇移防爲勦

詔下署川督崇實行之崇實以劉嶽署將二千八百人往  
川軍竟不出六月嶽昭增募黔勇五營以副將賀連璧將  
之大舉規尋甸李家福自馬龍謝景春自霑益全祖凱賀  
連璧自東川期會尋甸城外李家福攻七里橋燒木城三  
渡河奪大小尖山楊林匪來援拒破之全祖凱破柳河撫  
民寨十餘進駐清水溝七月李家福克青籠馬石二壘岑  
毓英遣軍來會官軍分壁鳳凰文筆山望城坡民寨多降  
李家福策賊碉林立難力取覘文筆上游有二河可達草  
海乃傍山築隄亘一百五十丈障水灌城先是尋甸至王

莊七十里民寨脅於賊皆豎白旗聞官軍至始反正嶽昭  
以民志未定八月親赴尋甸撫慰增山下隄水溢二丈傍  
草海賊壘皆沒而州城與他壘固無恙也九月嶽昭還曲  
靖李家福攻法鼓山旁近寨盡下之尋甸東路剗除略盡  
己亥進攻果馬克碉卡六庚子城賊來援破之平其壘二  
十餘十月壬子復擊破張徐灣十餘壘時澂江已克省防  
益暇馬如龍分兵來助其部將馬青雲等敗賊尖山十一  
月嶽昭親攻尋甸省防各軍已收富民武定羣賊環聚尋  
甸連營二十餘里民寨復叛遍山豎白旗迎賊圍師潰嶽

昭退守曲靖上疏自劾諸將降革有差

八年正月尋甸回犯馬龍掠霑益嶽昭遣軍拒走之楊玉  
科克柯渡可郎乘勝攻果馬規尋甸三月澂江回叛陷府  
城嶽昭遣柳明德赴宜良全祖凱繼之聽巡撫調遣毓英  
頻破附省之小偏橋蕭家山神羊寺糧路復通嶽昭乃復  
攻尋甸五月甲戌劉嶽噲劉嶽畯等分三路進先攻七星  
橋破碉樓十餘悉取楚軍故所屯文筆山諸隘而列營焉  
謝景春自三營出賊不意奪章格賊卡吳奇忠駐中河規  
塘子其酋馬順畏威乞撫嶽昭榜示村堡投誠者貸死民

寨望風詣降尋甸回大恐乙亥官軍益奮力攻城夜望城內燈火如畫人聲喧嘩其酋馬添順貽書馬廣願獻城自贖丙子克尋甸丁丑劉嶽曙整部入漢回男婦焚香跪道於是果馬羅沖古城羊街橫亘二百餘里村寨一百三十餘皆反正嵩明白鹽井亦復毓英誅降回李芳園晏洪分兵規祿豐易門安甯昆陽六月嶽昭遣李家福等進屯省城南門初貴州普安有苗寇嶽昭撥千人援之尋甸既克增遣張松林等解普安圍還師曲靖以降回馬添順五百人隸馬如龍部增調胡志祺等四營助省防留劉嶽曙守

尋甸八月毓英如龍分省防軍攻安甯各隘扼賊歸路羣  
回竄蹙回酋段成功蔡廷棟等先獻款壬子如龍扶病出  
城與毓英李家福嚴兵以待段成功蔡廷棟率五千人伏  
地請罪收南關外碉樓礮臺六十餘遺兵攻西壩克之時  
楊玉科已拔大姚廣通毓英克江右館益晝夜環攻生擒  
悍酋甚夥如龍親赴賊營勒回目自相斬獻而安甯逃匪  
悉爲何秀林所殲省城解圍餘匪併入土堆毓英如龍分  
兵規復旁近郡縣以滇楚軍合攻土堆馬忠等徇澂江李  
維述督張士進等徇楚雄李維鏞等徇南安王鍾祥助黃

文學攻定遠楊謙等助攻祿豐楊林李長春等助攻昆陽乙丑李維鏞克南安丙寅張士進克楚雄九月辛未黃文學克定遠時劉嶽昭已入省城增兵圍土堆張保和岑毓琦攻昆陽急回首赴省乞撫丙戌馬光明降其酋楊振鵬懼誅猶負隅自守馬如龍親至昆陽遣人入城招撫庚寅克昆陽俘楊振鵬馬聯魁等駢誅之昆陽距省百二十里中隔滇池舟行一夜可達振鵬久爲肘腋患同治元年就撫其後官至副將攝總兵猶踞城抗官軍及其誅人尤快之時祿豐已復李維述移師鎮南克沙橋普淜鸚鵡關辛

卯王鍾祥克彌渡廳十月劉興克紅巖王鍾祥進圍蒙化  
破其馬街土城官軍距大理百里而近杜首境地日蹙矣  
先是四月閒將軍崇寶川督吳棠遣提督唐友畊率六千  
人援滇友畊故大闢人軍次昭通姦民流言友畊將盡殺  
回族復仇魯甸威甯回大恐皆據險自保劉嶽昭飛檄友  
畊馳援省城以解之且遣知府吳春然往勘檄署昭通鎮  
全祖凱保護漢寨友畊將行漢民遮留求一戰比嶽昭使  
至唐軍已與魯甸回接仗漢回互傷獄昭騰書川帥諭止  
之崇實吳棠以川滇相距遠難遙度援軍進止聽獄昭主

持是月唐軍已擊破魯甸回寨回眾獻首乞降嶽昭乃檄  
唐友畊領援軍回川川軍入滇踰九月幾釀巨患於是東  
昭始安十一月甲戌陳定邦收賓川庚寅張潤收麗江進  
攻劍川十二月丙午克之壬子張家銘林光耀克緬甯是  
時劉光瑛李鳳祥等圍永昌騰越許繼衡等圍威遠楊玉  
科圍姚州多所斬獲惟澂江新興久不下乃議毓英如龍  
親攻之

九年正月壬寅許繼衡等克威遠馬標田四濫皆殛二月  
澂江回出犯九村中關大啞口營陷之竹園館驛回援新

興襲圍師營陷之甲辰岑毓英自將攻澂江辛亥馬如龍  
自將攻新興劉獄昭親至澂江覘地勢馬忠等前夫中關  
諸壘官軍悉復之獄昭還省城三月楊玉科攻姚州破其  
土城玉科受傷益開地道三十餘穴期必克東北城坍回  
猶築內牆抵禦四月丁酉朔地雷再發北城陷遂克姚州  
擒馬金保藍平貳檻送省城梟誅斬馘六千餘五月丁卯  
馬如龍親攻新興克之斬其酋田慶餘如龍患病還省城  
遣王正坤徇東溝馬永順屯新興圖館驛七月岑毓英督  
攻澂江克附城賊壘一百五十其西山村西街子賊廬悉

毀平之從民請也八月壬寅黃世昌等克永北甲寅楊玉科克鶴慶己丑李維述克鎮南嶽昭毓英令維述玉科世昌等駐軍新復之地休養士馬分其半番攻旁邑

上念維述玉科苦戰疲勞

特頒珍物示優異維述性慾直故以驃馬爲業初不知希榮貴及奉

上所賞白玉扳指適與指合乃驚歎

天子聖神益效忠盡無貳志所設肆市悉以巴圖魯號名之其榮幸

朝命如此玉科初頗驕蹇毓英善撫之所至摧陷嘗殺仇持其頭謁毓英意詰責卽爲變毓英笑而釋之故毓英之平滇楊李功爲多馬如龍則倚嶽昭自固師事嶽昭嶽昭亦資其力彈壓回眾世頗多讐昭毓英善馭曉將云閏十  
月乙亥張保和楊國發等克竹園竹園隸彌勒崑連開化廣南臨安爲迤南腴區廣西越南入滇道也官軍圍攻踰一年其黨舉火自焚死無一降者亦悍寇矣馬如龍破私財三萬金濟軍嶽昭以聞

優詔嘉獎

賞翎管搬指如例。如龍乃力疾赴敵。九月甲戌。楊玉科克浪穹。乙亥。克鄧川。進攻鳳羽白米關下之十月庚子。克長邑村。辛丑。克鍊鐵生。擒楊占鵬。占鵬杜文秀本宗母兄也。於是大理北路皆定。十二月。王祖佑李鳳呈收雲龍。

十年正月。李家福擊四川蠻匪於昭通。大破之。二月辛酉。朔岑毓英克澂江。澂江三面環山。其南阻海。賊先伐附城樹木。斷樵採官軍木柵薪標。皆取之百里外。圍攻一年。城破之日。將士憤憾。掠回人精壯者悉屠之。三月丙申。楊玉科克賓居。是時官軍已復三十二城。其未復者。大理永昌。

順甯三郡城蒙化騰越二廳雲趙永平雲南四州縣耳七月辛亥楊玉科克永昌八月岑毓英駐軍曲江十月攻館驛城外碉壘盡克之收五山夷寨十二月辛未破其西門遂入館驛與回共城而壘

十一年正月戊戌張保和克田心其酋馬世德自焚死庚戌楊玉科克永平及曲洞漾濞皆下之四月己巳李維述克雲南縣戊寅吳奇忠會黔軍克貴州興義五月丙戌楊玉科李維述楊國發等克趙州戊戌克蒙化趙州之戰杜文秀自率萬人出援踉蹌敗歸於是大理藩籬盡失賊勢

益不振九月丁酉張保和收婁児甲辰馬忠擒館驛回酉  
馬敏忠馬國政等駢誅之遷回民於村寨館驛乃定十月  
貴州提督周達武會滇軍克新城十一月總兵楊玉科克  
大理杜文秀伏誅大理東臨洱海西倚蒼山自文秀竊踞  
內築土垣包僞禁城其中楊玉科穴地道蟄塲東南城軍  
士乘缺而入賊據土城死拒復埋地雷破之自辛卯至戊  
戌陣斬二千餘人玉科屯軍內校場蓮花池增調五千人  
環攻僞城丁未文秀率死黨出戰玉科親擊之斃賊五六  
千文秀敗入僞城飲毒死叛回蔡廷棟等昇獻玉科氣息

猶屬卽割其首解送省城蔡廷棟者前閩省被獲復叛走大理者也毓英軍已次紅崖距大理百二十里十二月甲寅毓英親至大理部署撫事蔡廷棟楊榮佯稱乞款陰埋地雷於行館約玉科率二百人往玉科諾之比入僞城玉科潛至僞府據礮樓大呼兵勇爭血戰賊驚亂出四五千人圍玉科而毓英伏兵城外度玉科已達乘夜梯登與玉科合巷戰竟日官軍傷亡千計賊之死者萬人辛酉賊燒僞府奪門出走大理三城皆克獲文秀幼子三女一其黨魁楊榮蔡廷棟等百三十人皆就俘於是嶽昭毓英奏言

杜逆倡亂歷十八載攻陷五十三城西及四川會理東及貴州興義僞造禁城僭規王制直欲追蹤洪逆並駕一時官軍西征四次迄無成功咸豐六年提臣文祥調川軍助勦克紅崖圍賓居而東西各回圍省退兵還援則彌渡雲縣失矣九年提臣褚克昌克鵝關雲南驛而館驛濱江回眾攻陷廣通楚雄鎮南以襲其後則褚克昌之全軍覆矣同治二年臣毓英在署藩司任內連拔景東鎮沅永北楚雄廣通定遠進規鎮南而馬連陞馬榮率露益尋甸之眾佔踞曲靖馬龍平彝撤兵回顧則大理之役遂不果矣

六年提臣馬如龍甫至定遠前軍失利而合國安楊振鵬等內外勾結連失定遠楚雄以次二十城則省圍幾莫解矣推原其故皆由東南黨援未除則迤西寇氛愈熾故先從各路征剿克曲靖而東隅固解省圍而內患清復澂江而內地甯平臨安而南徼定由此內顧無憂遠圖易舉臣等所以先事東南而後專事迤西者職是故也捷聞將帥獎擢有差是月李維述楊國發克大圍埂而小圍埂猶負險自守楊玉科會維述等攻克之

十二年二月辛酉楊玉科克錫臘壬申蔡標克猛郎甲戌

楊玉科克順甯四月庚戌玉科蔡標克雲州戊辰和耀曾  
克小猛統五月庚辰李維述克騰越雲南平嶽昭奏請入  
覲

詔曰可岑毓英兼權總督

十三年嶽昭至都

上慰勞之

賜壽禮有加焉頃之

詔還鎮

光緒元年劉嶽昭罷是時滇邊野夷殺洋人瑪加理英吉

利公使訴於

朝語速疏英授劉長佑爲雲貴總督潘鼎新署雲南巡撫  
二年四月長佑行次貴州受印奏曰臣於洋務非所素習  
然責無可辭不得不預爲防慮雲南五金並產洋人覬覦  
已久特借瑪加理事反覆挑撥以肆要求今若制機器開  
採則利由自取權不入操夫藩維不固莫禦外侮之侵兵  
甲不修難爲小邦之庇今緬甸接壤於印度越南割地於  
法人彼自立之未能豈維屏之能寄臣擬簡練精兵扼咽  
喉之地備戰守之資爲外藩近接聲援爲中國資其捍衛

則洋人覬覦之心或當稍斂。

上嘉勉之。五月長佑至雲南省城而蘇開先叛踞騰越先  
是永昌李朝反已就撫矣。會妖人王道士踞盩達自言幻  
術能禦鎗礮愚民多惑之。蘇開先者已保參將職藉索餉  
誘練軍謀亂遂陷騰越。王道士與之合逆燄益張於是順  
甯雲州土豪悍卒乘機肆起踞城池殺守令永昌降人應  
之迤西大擾長佑檄署提督楊玉科率師往討道員陳廷  
珍副之閏五月副將李應舉克雲州賊併入順甯順甯城  
聞官軍至亦棄城走躡之雪山箐禽其酋高顯而李朝竊

犯永昌爲提督和耀曾所殛餘黨解散六月楊玉科等攻騰越克之蘇開先王道士伏誅長佑飭諸路搜治逋寇段成虎等百數十人悉戮之迤西平長佑以土練反覆難馴奏令提督胡中和募楚勇千人自川入滇副將文明廸楚勇五百人自粵西入滇明廸長佑舊部也故事雲南額兵挑練軍者十之七皆給全餉赴征調其汰存底營者月餉緩七發三文武吏率以不敷防守爲請長佑乃裁兵就餉減額兵之半而以五成兵數餉給之別留練軍十二營備調遣歲增銀僅十餘萬而全省軍制改觀無憂飢匱矣是

時瑪加理讞成英人約於雲南設埠通商。

詔下其議長佑奏言滇省漢夷雜處種人獵悍成性剽掠行旅其腹地散練首民燒香拜會小則攔路劫殺大則入城焚掠萬一防護不及致有同於前案或更甚於前案其有害於雲南一隅猶小其有撓於中夏全局甚大且洋人知前案難辦有免其既往之議知後患難防有保其將來之議臣恐滇省官民於已往者不以爲倖免而以爲得計將來者不引爲前鑒或敢於效尤洋人意在圖利亦斷無不思遠害之理應俟三五年後內外安定遣員商辦

上善其議是冬四川巴蠻掠昭通總兵全祖凱遣兵渡金沙江擊之盡燒其船巴蠻遁回巢時昭通之大關鎮雄之伐烏關土匪並起長佑檄全祖凱悉破平之迤東皆靖而廣南那雞寨有積匪數百踞山崗肆搶殺寶甯知縣李賓擊走之殲其酋王喜四月騰越逸匪許雙貴擾隴州之崩竈總兵謝景春擊破之長佑之初至滇也諸騎將猶擁重兵頑梗鴟張官民含訶隱忍未敢頌言其非及楊玉科移廣西右江鎮胡中和履提督任長佑用兵部議武職例應迴避本省者率以兼轄之貴州量移之諸武職亦以平昔

斂怨多懼仇讐甘心願他徙避禍於是豪率並解兵柄牧令稍得行其法監司郡守始敢覈吏治矣

四年春巴蠻自雷波渡江掠滇境昭通鎮李明惠擊破之生擒百十九人羣蠻悔罪歸誠長佑令留其酋馬曲哈爲質餘皆縱還迤西道熊昭鏡暨騰越楚雄昭通諸文武吏緝逋寇許雙貴等數十人並其黨誅之騰越徼外土目耿榮高等爭地相殺結回夷三千攻陷耿馬遣參將周慶安討之耿榮高降七月臨安納樓土族普保極爭襲搆兵阿迷蒙自開化土匪響應其酋楊阿幅踞田心謀襲阿迷城

於是廣南彌勒邱北皆擾長佑遣道員許繼衡率練軍討之九月繼衡薄田心破其壘數十楊阿幅伏誅餘黨走開化官軍復敗之馬塘拔難民數千儂回夷猺皆就撫而他股在廣南者復爲兵練所敗彌勒邱北諸匪皆遁匪首普雲沈開科誅殛殆盡普雲者阿迷夷人與蒙自楊阿幅初約起事者也沈開科者儂夷種始與普雲倡亂已就款撫而時服時叛三渠旣殲羣盜瓦解矣十二月阿迷逸匪起安平同知潘英章等襲破於涼水井

五年正月進克三光馬毛諸寨擒匪首黃春鄭小安皆普

雲黨也長佑以臨郡無事檄許繼衡等籌撫輯繼衡自臨安赴納樓促諸頭目上糧納款且散回眾禁燒殺土族普保極等率老弱歸誠羣回聞風乞款繼衡悉資遣之臨安開化廣南皆平自騰越蘇開先之亂其黨劉寶玉逃之野山野山者居滇甸之交爲華夷甌脫其夷自爲君長不隸於羈屬劉寶玉糾野賊十三種及盜達羅夷伏羅坤山時出劫掠長佑患其害行旅將捕之適緬甸官詣騰越持圖說上騰越鎮廳約由野山通道列戍鎮廳寢其事劉長佑曰此必英人之所嗾也英人議通商久矣吾雖不爲彼用

亦當有以固吾圉乃檄熊昭鏡親赴騰越召諸土司野賈  
申禁約其屯練出租之已失者復之墩卡弩手之未補者  
補之因囑誘擒劉寶玉於干崖誅之諸野夷皆解散八月  
鎮雄匪起把總岑自開擊散之十一月敎匪高春起尋甸  
犯州城長佑調練軍合兵圍破平之高春殪於陣  
六年正月永昌夷匪掠保山檄騰越練軍屢擊破之匪首  
龍保赴怒江死八月長佑出校營伍遍厯三迤十一月事  
竣自道光末不行此典者三十年矣是冬四川黑蠻掠東  
川官軍躡之江干蠻多溺死

七年四月總兵鄧榮升擊廣南匪破之匪首王澤寬遁八月敎匪卯招詳犯昭通奸細伏城內肆焚掠殺游擊張宗久等副將涂開科奮擊破之卯招詳殛長佑檄許繼衡勘其事搜餘匪盡誅之時法郎西窺越南東京佯稱捕盜增召兵船將道紅江達雲南通市

詔慎粵備邊長佑以爲欲援越南宜先復琉球欲制法人宜先討日本乃奏曰自西人通商日本始從諸國之後設公司於滬上遂侵臺灣滅琉球英法諸國相視不發國家旣釋倭人而不誅則有以知中國之好安而惡戰旣

不問滅琉球之罪則必不問滅越南之罪故法人遂憫然自肆剪我藩籬今若及東京未破先討日本以復琉球則時雨之師足以下俘囚之涕九伐之法足以懾逆夷之心是不戰而存越南也

旨留中十一月

上復問弭釁安邊之策長佑謂法夷自據嘉定六省以來越南四境皆有商埠教堂取越與否非有甚異其所以處心積慮者乃在通商雲南與其旣吞越境爲守邊之計不如乘其始動爲弭釁之謀滇粵三省與越接壤東西幾二

千里叩關造釁莫可端倪要害與共勞費殊甚若自三江  
口以至海陽東西僅數百里以中國兵力爲之禦敵東京  
兵聚而力省以視防守滇粵之邊勞逸懸殊請以廣西兵  
二萬出中路廣東雲南各以萬人相犄角廣東之兵自欽  
廉而入雲南之兵出洮江而東別以輪船守廣南順化港  
口斷其首尾法人必無自全之理

詔下總署王大臣議之三月法人陷東京越匪紛起廣西  
援兵至太原長佑遣道員沈壽榕出關與相聯法人怵  
王師大集乃以東京還越官毀其城而去七月沈壽榕屯

宣光之都竟造戰艦扼紅江

朝廷念邊事亟擢四川道員唐炯爲雲南布政使率川軍千人屯關外滇軍悉聽節度頃之法越和議成法人益謀入滇劉長佑請入

覲

詔以福建巡撫岑毓英爲雲貴總督駐軍蒙自屢與法人戰越南其後劃界事定雲南乃罷戍

王定安曰寇興楚軍戰績滿天下其將帥率召鄉人子弟挈之遠征獨雲南則不然其初勞文毅崎嶇入險子然一

身寢饋於毒虺封狼之側冀感其心而資其力功雖未就其志亦足壯已劉公嶽昭提數千久勞之師當百萬方張之寇餉不時至地非素習其規畫迤東硜硜以攻尋甸斷賊援爲說迨尋甸克而省圍遂解竟如所策所謂好謀能懼者耶當是時岑公毓英用民練八萬忍飢血戰極人世之至難非和衷讓善何克成此偉烈哉劉武慎苦心孤鶩不假聲色騎將悍弁相率解兵符離虎穴可云潛運默移折衝樽俎者矣其論救越南以伐日本爲先尤中肯綮非譏謔小儒所能道昔晉楚爭霸則伐鄭齊楚爭霸則伐陳

蔡齊晉固未能滅楚楚亦未能滅齊晉今中夏之與歐洲  
固若晉楚然而日本則鄭也故並錄之以俟識時務之君  
子擇焉

湘軍記卷十五

東湖黃學濂校字

湘軍記卷十六

東湖王定安撰

平捻篇

捻之患不知其所自始。或曰鄉民行儺逐疫，裹紙然膏爲龍戲，謂之捻。其後報讎嚇財，掠人勒贖，浸淫爲寇盜。或數人爲一捻，或數十百人爲一捻，白晝行劫，名曰定釘。山東之兗沂曹河南之南汝光歸江蘇之徐淮直隸之大名安徽之廬鳳潁壽承平時在在有之。嘉慶中河南巡撫始奏定豫捻結夥三人以上比照回民例加等科罪，而山東亦

言結捻結幅之案以人數多寡定罪名重輕其後安徽仿行之然必曳刀會方論斬梟其僅結捻訛搶者擬以斬絞發遣蓋猶未視爲叛逆也咸豐元年廣西寇起豫皖之間奸徒竊發南陽壽州皆有捻患三年洪秀全陷安慶踞金陵遣黨徇臨淮鳳陽出歸德以擾河朔於是皖豫捻患益熾其酋曰李士林劉疙瘩劉元吉任二皮龔瞎子而張樂刑尤爲羣捻之魁樂刑起蒙城雉河集雉河集者今渦陽縣治是矣當是時

文宗憂中原慮捻粵勾結

命周天爵駐徐宿禦盜旋以給事中袁甲三代之駐潁亳前總督牛鑒駐陳州而以軍事責河南巡撫英桂總其成其年李兆受起霍邱掠商固光州與皖捻應四年英桂遣兵捕兆受不得兆受圍商城捻眾益盛其年安徽巡撫福濟久攻廬州不克命民間築圩寨自保寨各置渠率犄角相救助於是寨長圩長出入於兵捻之間悍練漸不可制矣五年袁甲三罷甲三號能軍已擢副都御史以擅委宿州牧落職

文宗益倚任英桂屢促其進師圖皖英桂藉詞防邊徘徊

境上不敢進。

嚴旨日至弗顧也。六年起袁甲三助英桂甲三攻張樂刑於雉河集屢有斬獲。七年春復

命勝保助英桂捻圍固始勝保戰屢捷。李兆受糾捻粵陷六安霍邱。圍壽州陷正陽。自光固息商西至商南二千里烽火相望。三月勝保破張樂刑於柳溝。五月勝保大捷於三河尖。樂刑走霍邱。依兆受。七月勝保克霍邱。八月克正陽。而英桂以舞葉宜嵩有捻駐禹密防之。其年冬捻遊騎至開州東明入直隸境。八年英棨爲河南巡撫。勝保援臨

淮納降李兆受至清流關撫其眾而練酋苗沛霖亦平瀆  
渦諸捻圩隸於勝保

詔勝保以欽差大臣督安徽軍袁甲三專三省討捻事秋  
捻掠山東還走河南陷周家口九年二月捻破官軍於舞  
陽總兵邱聯恩戰死袁甲三劾免以傅振邦代之振邦卒  
苗練攻鳳陽臨淮下之七月捻陷定遠巡撫翁同書退壽  
州八月捻復踞鳳陽臨淮勝保以母憂歸起袁甲三爲欽  
差大臣甲三既至克臨淮十年正月捻陷清江淮揚道吳  
葆晉副將舒祥死之漕督聯英河督庚長皆走淮安

詔奪官。河南捻趨鞏洛。秦晉皆警。以府丞毛昶熙總河南團練。其年秋。英夷款成。海防無事。

命科爾沁郡王僧格林沁移師山東討捻。時菏濟之間皆寇氛。僧王率萬二千人至濟甯。十一月攻捻鉅野不利。十一年正月。僧王遣軍援菏澤。復敗還。

詔責其輕進。捻自曹州趨鄆城。渡汶掠泰安。都統伊興額總兵滕家勝戰死。遂圍青州。而河南捻蹤充斥。連二十餘縣。西及浙川。莘范盜北侵畿輔。復

命勝保領萬人出屯景州。九月苗沛霖陷壽州。皖北捻滋

益甚僧王遁詹啟綸募軍防清淮僧軍南下沂邳論功進  
爵親王冬僧王攻亳北諸捻圩連破平之

同治元年二月苗沛霖合粵捻犯潁州三月湘軍解潁州  
圍四月廬州克安徽粗定而河南捻入商州與粵賊合連  
陷鎮安孝義渭南華州陝西大擾

詔勝保多隆阿入關多隆阿率楚軍攻商南捻破之捻還  
走河南由宛郡趨棗陽陷隨州應山京山七月袁甲三乞  
病李續宜母喪辭欽差大臣以唐訓方權安徽巡撫總兵  
事臨淮不復置帥時苗沛霖與湘軍構畔聲言入陝隨勝

帥

穆宗大怒逮治勝保降捻宋景詩本山東廁盜聞勝保獲罪叛於邵陽率黨千人走山西直隸云赴京爲勝保訴冤官軍不敢遮遏遂與東匪張錫珠合錫珠亦降捻也於是直東教捻蠭起畿輔頗震山東巡撫譚廷襄罷以閻敬銘代之

詔兩廣總督劉長佑航海入津討東匪冬僧王攻渦河捻圩誅其酋楊興太羣捻多降

二年正月

授劉長佑直隸總督僧王攻雉河集克之擒斬捻酋張樂刑姜台凌等樂刑兇悍爲捻中渠魁及其誅遠近稱快其從子張總愚領餘眾與陳大滄合賊中號小閻王二月僧王移軍攻淄川三月克之移攻教匪於白蓮池東匪犯深州掠廣平劉長佑自衡水親擊之匪還走山東僧王遣蘇克金敗之平原乃分五旗掠畿南長佑親敗之曲周降其酋楊鵬嶺解散千人四月

命長佑兼直東豫三省邊界勦匪事時東昌匪巢林立巡撫安坐省城不之間長佑乃檄直隸臬司王榕吉赴東昌

治其黨五月捻酋蘇老夢相盤等掠永亳程四坎等侵固始六月劉長佑誅張錫珠於陣責楊鵬嶺等勒降眾繳械馬歸農東匪平七月長佑討宋景詩於館陶以堂邑空虛東撫不設備奏飭閻敬銘移營東南期夾擊而自督軍刈禾進誘匪入伏抄擊敗之宋景詩走開州僧王破平白蓮池遣陳國瑞將三千人援臨淮諸捻圩聞王且至爭反正十月僧軍誅苗沛霖於蒙城禽捻酋相盤葛小年鄒煥林龔耀駢誅之程二坎李大個魏羣兒乞降皖北始稍靖張總愚等西掠南陽襄陽其年劉長佑始議設直隸六軍諸

行省練軍自此始

三年春豫捻犯隨州應山僧王自歸德躡之官文遣舒保擊捻德安西大破之窮追入山谷爲賊乘力戰死舒保名亞於多隆阿每軍所至百姓焚香鳴爆竹迓之惟恐其去及其歿士民悲悼六月曾國荃克金陵粵賊餘黨自陝西東援者皆萃楚境合於捻八月僞扶王陳得才等自麻城犯羅田僞遵王賴汶光合張總愚犯黃安而毫捻任柱牛老洪李允等復與總愚合九月捻犯蘄水石清吉戰歿圍成大吉於蘄北官文出黃州僧王軍麻城

詔兩江總督曾國藩督師援鄂，國藩自請駐安慶，且言四百里內駐欽帥三人，恐羣盜輕

朝廷。是月僧王敗捻，斬州。張總愚走太湖宿松閒，陳大禧走英山東逼近商城。會粵賊爲僧王擊敗，數萬眾皆降。惟賴汶光、張總愚北趨豫境。十一月僧王擊捻襄陽，未交綏降，賊復叛。僧軍大挫，羣盜由南陽趨魯山。僧軍躡敗之，因走尉氏入鄢陵。

四年二月捻掠中牟，侵黃河邊。三月捻入山東，突騎剽疾，數日間曹單定陶、菏澤、鄆城、鉅野逆氛徧野。宋景詩率馬

賊三千趨堂邑直邊皆警

詔責僧格林沁縱賊北竄

命湖北巡撫吳昌壽率師赴豫接替僧軍旋移河南巡撫  
捻已至曲阜東南走滕嶧復渡運東北走蘭山南走郯城  
趨贛榆青口勢將南下

朝廷憂裏下河

詔曾國藩李鴻章備淮揚防四月捻復還走山東自曹州  
北自濮范東至鉅野嘉祥西至東明定陶蔓延數百里河  
北大震當是時河南安徽山東諸省既久罹捻禍居人築

寨自衛寇至無所掠則大呼圩民餉錢米違且攻寨民亦略輸賊冀免禍僧王度寇糧匱令軍士橐饅餅晝夜窮追輒數十日不離鞍馬手疲不能舉纏索以布帶繫肩上馭馬捻知僧軍疲益狂奔或分東西走誤我軍

穆宗憐其勞諭擇平原休養士馬且誠其勿輕臨敵曾國藩亦言賢王不可久勞宜假休息養銳氣而王性忠勇期旦夕滅賊至是躡捻曹州捻佯敗自汶上渡河走鄆城西北水套結土匪聚馬步十數萬以待王軍追至伏賊盡出圍我軍王奮斬數百人圍益厚乃率百餘騎突圍走捻依

林伺之王騎被矛傷驚逸墮地被八創死之部弁奪遺骸  
瘞麥田中事聞

上震悼遣侍衛克興阿等偕王世子伯彥諾謨祐赴山東  
迎柩諸督撫將帥以陷王皆獲嚴譴惟陳國瑞苦戰免議  
是時中外震驚謂捻且乘勢犯畿輔

詔曾國藩督師北征且促曾國荃銷假入覲募舊部隨同  
勦賊五月國藩奏言僧格林沁督兵重臣猝爾捐軀震遠  
近之人心長逆賊之兇燄

朝廷責臣討賊至切且速然有萬難迅速者數端金陵楚

軍僅三千人作爲護衛。此外惟調劉松山甯國一軍。如楚軍不願北征。當酌帶楚軍將弁。另募徐州勇士。存楚師之規模。開齊充之風氣。約須三四月乃可訓練成軍。此其不能迅速者一。捻匪戰馬極多。馳驟平原。其鋒甚銳。臣不能強步兵以當騎賊。擬派員前赴古北口採買戰馬千匹。加以訓練。此其不能迅速者二。扼賊北竄。惟恃黃河天險。若興辦黃河水師。亦須數月乃能就緒。此其不能迅速者三。僧格林沁之忠勇絕倫。婦孺皆知。華夷傳誦。其統兵追賊。日行七八十里。或百餘里不等。然步隊不及馬隊。駕馬不

及良馬勢必參差不齊聞僧格林沁於三月馳至汶上步  
隊後七日始到兗州馬隊亦有後三日始到者行走太速  
勢不能自帶米糧埋鍋造飯行文州縣令其供支麵飯兵  
燹困苦之餘州縣力難具數千人之食又或倉猝得信家  
丁逃匿或兩縣交界彼此推諉將士爭先落後飢飽不均  
有連日不得一餐者其隊伍難整在此其行軍神速亦在  
此臣處行軍每日支帳埋鍋造飯不向州縣索米供應略  
師古法日行僅四十里或二三十里李鴻章之淮勇亦仿  
楚師之法其步步穩妥在此其行軍遲鈍亦在此僧格林

沁一年以來周歷湖北安徽河南江蘇山東五省臣接辦此賊不能處處兼顧如以徐州爲老營則山東祇能辦兗沂曹濟四郡河南祇能辦歸陳兩郡江蘇祇能辦徐淮海三郡安徽祇能辦廬鳳潁泗四郡此十三府州者縱橫千里捻匪出沒最熟之區以此責臣督辦而以其餘責成本省督撫則汛地各有專屬軍務漸有歸宿此賊已成流寇宜練有定之兵制無定之賊方今賢帥新隕劇寇方張臣不能速援山東不能兼顧畿輔爲謀迂緩駭人聽聞然籌思累日計必出此時李鴻章遣潘鼎新率淮勇五千浮海

入天津比至。捻已休息南還。

詔曾國藩兼制直隸山東河南旗綠營及文武員弁皆聽節度。國藩固辭不拜。

優詔慰勉之。先是東撫閻敬銘聞黃家圍教匪謀變發兵掩捕屠男婦二千餘人案驗無實其所指教酋張某者署陝西巡撫張集馨弟也山東士民冤憤已久及僧王陣亡敬銘洶懼棄東昌急走濟南物議益譁朝士交章論劾僉謂僧王之敗由敬銘不應口糧且於王薨之次日佯爲不知密疏請添幫辦以逞先見該撫回省後潛使家眷扮民

婦逃匿齊河。又臚濫保親戚多款事下曾國藩。國藩覆奏閻敬銘請添幫辦之疏實在該親王陣亡後一日所發果若所言心術豈復堪問。且賢王已逝而僞奏以謁先見之明此至愚之小人所不忍爲豈閻敬銘而爲之該撫自負清正輒以不肖待人故僚屬怨其刻覈至其親戚李均貪鄙妄爲眾論相符應請褫革。

詔允之。張總愚趨宿亳皖軍迎擊於龍山。總愚陷高爐集賴汶光牛老洪任柱等繼至遂圍雉河集。雉河集者總愚老巢也。布政使英翰駐軍防守羣捻併力死爭冀復據之。

英翰率二十餘騎走西洋集留史念祖死守待援國藩檄  
黃翼升水師赴臨淮周盛波援蒙臺劉銘傳自濟甯赴徐  
州嚮晚北時山東肅清侍衛克興阿等率馬隊四百護僧  
王柩北行所過士女焚香哭送者數十萬人自山東達京  
師絡繹千里各處建祠私祭遇忌日設齋醮如祀其祖禡  
焉閏五月曾國藩出屯臨淮始委員搜查圩寨造良民莠  
民冊擇良者給執照爲圩長其梟黠不法者悉案誅之蒙  
毫奸宄始知畏法馴懦者亦得重見天日矣六月周盛波  
敗賊渦河北劉銘傳敗賊龍山石弓山豫軍張曜宋慶攻

破陳家園進兵余樓皖軍張得勝克高爐集官軍環逼雉河捻糧罄潰遁雉河解圍賴汶光李允走歸德陳州張總愚任柱走睢州張曜等軍自鹿邑柘城躡擊敗之乃西趨汝洛劉長佑遣礮船西巡河壩黃河水師自此起七月張總愚等由南召魯山趨荆紫關以窺湖北賴汶光等西走舞陽將與總愚會合南奔八月曾國藩移駐徐州張總愚等東走鄧州復西北走鎮平張曜迎擊於黑龍集大敗之遂走唐縣任柱賴汶光等走沈邱劉銘傳要擊敗之乃走項城越周家口渡沙河而北道西華入太康銘傳躡之至

睢州復大敗之. 捻走考城定陶. 窺入青石關. 青石關者. 登萊青三郡要衝也. 張總愚圍新野. 弗克. 遂犯南陽. 張曜等擊走之. 九月.

上以總愚游奔宛境. 慮闖入秦晉.

命李鴻章馳赴河洛. 扼山陝門戶. 時任柱陳大淳賴汝光牛老洪等馬步六七萬眾徧布菏澤曹定閒分黨掠銅山濟甯. 勢將渡運而東. 曾國藩檄色爾固善張樹珊由濟甯迎戰. 潘鼎新自鉅野會之. 而留劉銘傳屯周家口. 周盛波屯歸德. 顧西路. 張樹聲屯徐州. 劉松山屯臨淮. 顧中路因

言捻勢東趨河洛現無可辦之賊臣所部楚師除留劉松山勦捻外餘挺全撤今所倚以辦賊者如劉銘傅潘鼎新張樹珊周盛波皆淮勇最勁之兵所駐皆三省最要之地李鴻章豈能撤臣布置已定之兵挾以西行

詔罷前議潘鼎新張樹珊合擊捻魚臺豐縣閒連敗之捻還走單縣十月張總愚犯棗陽新野鄂軍江長貴姜玉順等敗之總愚自裕州折走魯山窺嵩洛復折而東十一月任桂賴汶光走虞城趨睢州將道舊黃河北繞汴梁與張總愚合周盛波迎擊於睢州敗之捻走太康與總愚併圍

扶溝劉銘傳自周口援扶溝復大敗之國藩更令張樹珊  
屯周口劉銘傳率師遊擊捻走襄葉舞陽後股奔西平遂  
平復分爲二賴汝光走魯山張總愚走唐縣鄂軍劉維楨  
設伏敗之斬其弟張總志十二月張總愚走新野賴汝光  
牛老洪走光州分掠商城固始犯信陽湖北大震成大吉  
軍譁宋埠叛卒旬捻大掠黃岡黃安黃陂孝感皆受荼毒  
官文飛書乞援國藩遣劉銘傳援黃州

五年正月張總愚犯樊城鄂軍江長貴郤之捻還走新野  
賴汝光牛老洪陷黃陂鄂軍梁宏勝迎擊於黃岡之衛埠

力戰死之劉銘傳克黃陂

詔曾國荃爲湖北巡撫。國荃自克金陵，散伍歸農，養病湘鄉。前已起爲山西巡撫，未行。

朝廷以鄂事棘，促募舊部赴鎮。二月，徐州湖圍案結，曾國藩移駐濟甯。湖圍在銅山、沛縣之交，故微山湖灘地咸豐四年閒，黃河溢曹州，山東難民唐守忠率眾居之，賴地百餘里，眾數萬人。徐州官吏已升科定賦矣，其地膏腴，歲收數倍。銅沛民豔而爭之，湖圍乃結捻自助，讎殺無已。銅沛民訴之，國藩國藩下令驅逐，或謂寇氛方熾，激之且盡。

變爲捻國藩遣劉松山引兵屯團中團民皆攜農器回山東撥銀四萬令原籍牧令撫卹之徐境以安乃設同知治其地張總愚自新野北走舞陽郾城禹州至中牟窺渡黃河直隸水師擊卻之捻走曹州掠菏定鉅鄆東軍楊飛熊王心安敗績任柱賴汶光自光息正陽走項城沈邱張樹珊率隊出擊捻一日夜南行二百里至江口集嚮蒙亳劉銘傳躡至潁州戰良久其部將黃桂蘭被捻圍抄甚急銘傳發炸礮擊之皖軍來助始大奔三月捻走槐店張樹珊要之苑寨捻復分左右翼包抄幾爲所困樹珊與其弟樹

屏首尾夾擊捻從周口渡河東走鉅野銘傳緊躡之與捻  
旌旂相望連擊於烏官屯龍堌集皆大敗之捻南還城武  
曾國荃汰湖北冗軍增湘軍六千以記名布政使彭毓橘  
提督郭松林爲大將統之時賊騎數萬東奔西突相去動  
三千里官軍常失之不及國藩已增調李昭慶劉秉璋楊  
鼎助備遊擊又以閩粵新平調鮑超萬二千人北行合之  
湘淮諸軍所部逾八萬矣四月張總愚等走豐單任柱等  
走睢甯犯亳州國藩奏言徐州居四鎮之中東北則畿輔  
爲天下根本東南則江蘇爲臣軍根本東路既重不得不

藉運河衣帶之水爲流寇阻截之界惟河淺汛長千有餘里擬與直隸山東增隄置柵畫地分防乃約閻敬銘同巡運河劉長佑自張秋來會定議自范縣豆腐店以下並張秋東阿隸山東防豆腐店以上至東明長垣隸直隸防蓋張秋爲黃河要津山東向不設守也又於運河築牆濬濠北起安山戴廟至沈家口南訖八閘宿遷至密灣成子河分段設戍是爲守河防運之始劉松山敗張牛於湖圃躡至曹縣合李昭慶夾擊走之捻自豐沛犯徐州董鳳高李祥和卻之五月劉松山追捻徐州西屢破之張總愚走虞

城睢州圍陳州犯周口北寨牛老洪亦由宛寨渡河與之會劉松山張詩日潘鼎新追奔數百里張樹珊分隊雕勦捻渡沙河而南任桂賴汶光自懷遠渡渦踞下蔡王永勝劉秉璋躡之捻自潁州留陵口偷渡沙河遇周盛波軍折走西北國藩以運防已固復建議扼守沙河自周口下至槐店槐店至正陽均守沙河國藩與喬松年任之自周口上至朱仙鎮守賈魯河國藩任之自朱仙北四十里至汴梁又北三十里至黃河無水可扼李鶴年挖濠守之正陽以下皆濱淮水師與皖軍任之於是劉銘傳潘鼎新張樹

瑚督軍士築長牆。皖蘇官民助之。蜿蜒七百里。以達於運  
防。屹然若長城矣。劉松山朱式雲等擊捻西華上蔡連敗  
之。七月捻圍南陽。尹寨。劉松山會宋慶夾擊之。張牛等走  
鄉縣禹州。而任柱賴汶光盤踞葉縣舞陽。以窺湖北。曾國  
荃出屯德安。檄鮑超自棗陽趨淅川內鄉。防西路。郭松林  
自桐柏唐縣橫截而出。防東路。劉維楨嚮新野爲霆軍聲  
援。捻偵南路備嚴折而北走。是時曾國藩自濟甯道運河  
微山湖入洪澤。浮淮泗至臨淮。患病。以雉河亳州皆捻巢。  
迂道渦河。令章合才率親軍五百先導。國藩乘輕舸浮渦。

而上至亳登陸八月至陳州周口駐營上疏乞假捻合四  
股趨中牟偵沙魯河牆已成惟汴梁近地未訖功乘夜東  
趨撫標三營皆潰捻急走山東劉銘傳遣馬隊追至杞截  
其後部國藩急檄劉銘傳潘鼎新趨虞單劉秉璋楊鼎助  
自徐州韓莊東援張樹珊衛護

孔林時論以長牆千數百里虧於一簣頗咎李鶴年於是  
題防黃防同時皆警國藩焦憤增疾頗自陳衰狀請以李  
鴻章駐徐州顧山東曾國荃駐南陽顧河南國藩自駐周  
家口扼其中兼顧皖豫並請飭直隸山東礮船巡黃河屏

蔽畿輔

旨皆報可。捻合犯鉅野東軍王成謙王正起郤之。捻猛攻運牆三晝夜不克。乃引去。九月劉銘傳潘鼎新要擊於梁山大破之。追至菏澤曹縣東明連敗之。鼎新至杞銘傳至睢州。捻悉眾集河南。復分爲二。自此稱東捻西捻。東捻任柱賴汶光徘徊黑岡。掘榮澤壩二十餘丈。冀引黃河灌汴梁。河南礮船會宋慶陸師擊走之。乃自中牟一晝夜行三百里至曹縣。夜撲袁口。東南突開河圩牆。皆阻東軍不得過。遂由安山戴廟擾長溝。西捻張總愚走許州。牛老洪死。

其子牛喜領其眾。捻至襄城。鮑超自裕州迎勦。捻已走汝  
郊。超至魯山。捻由宜陽永甯乘夜狂奔。超自汝洛緊躡之。  
捻道閻鄉太峪口繞潼關入陝。犯商州。於是國藩檄劉銘  
傳潘鼎新張樹珊專勦東捻。鮑超劉松山劉秉璋楊鼎助  
專勦西捻。捻亦不再合。以訖於滅。十月。西捻自華陰走朝  
邑。窺渡黃河。陳湜水師卻之。適涇州勇潰。甘回又犯甯州。  
陝西大擾。巡撫劉蓉飛書乞援。鮑超奔馳千里未及賊。回  
軍南陽。劉秉璋楊鼎助已至陝州。回軍新鄭。

朝廷以陝省危急。促鮑超入關。東捻走豐。劉銘傳橫擊之。

捻分爲兩任柱北走賴汝光東南走銘傳復敗之渠家寨  
捻併入沛縣湖圃走曹縣至太康銘傳張樹珊周盛波連  
敗之是月曾國藩乞開缺留營

詔俟病痊來覲以李鴻章暫代督師鴻章謙讓

改命國藩回兩江本任

授鴻章欽差大臣國藩四上疏懇辭

穆宗溫旨慰勉之東捻道光固走信陽曾國荃出屯武勝  
岡遣軍迎擊捻折走羅山趨光固英翰截之還嚮麻城宋  
埠掠黃岡之新州倉子埠國荃遣譚仁芳敗之孝感捻陷

雲夢應城突攻德安遣郭松林破走之應城雲夢皆克復敗之皂河楊逢劉銘傅軍次麻城周盛波張樹珊次隨鮑超次棗陽劉秉璋駐隨棗閒宋慶亦率軍赴鄂援師羣萃湖北西捻至華陰陝軍大挫捻聚灞橋西安戒嚴時鮑超及淮軍諸將皆不樂西征國藩檄劉松山援陝松山毅然自任其後削平秦隴討定西域所成大矣十二月郭松林追捻一日深入中伏傷脰不能起至夜部弁負之出其弟郭芳鉉敗死獨沈鴻賓五營苦守獲全彭毓橘譚仁芳等追捻至沙港敗之捻犯安陸國荃遣劉維楨等擊卻之西

捻自臨潼走新豐陝軍阻於雪捻逕犯西安諸軍躡之灞  
橋捻突以馬隊包抄三十餘營皆潰湘軍將蕭德揚戰死  
遂圍省城時劉蓉已罷巡撫喬松年飛章告急

詔陝甘總督左宗棠督軍討西捻張樹珊擊東捻於德安  
之新家閘敗績死之捻復走臼口詐稱難民將渡漢而北  
國荃遣水師截擊走之捻復犯安陸劉銘傳追擊敗之

六年正月東捻屯尹溼河鮑超劉銘傳約期會戰超後期  
銘傳先至戰不利陣歿六百餘人超已引軍東久之知銘  
軍敗隔河而陣寇騎如潮超以劈山礮環擊馬多謖相持

至黃昏捻漸不支超麾眾壓之捻披靡馬步自相蹂死者萬人超乘勝渡河追十餘里銘傳亦回軍猛戰盡奪所失驃馬捻由白口北逸超追殺五晝夜俘斬甚眾捻狼狽走河南超旣大捷銘傳怨超賣已超亦謂李鴻章偏袒互有違言超乞病

屢詔慰留曾國藩李鴻章使問相望卒不應乃罷其軍劉松山擊捻於西安雨花寨編修張錫嶸率百餘騎遇伏死之官文坐事罷

授李鴻章湖廣總督以江蘇巡撫李瀚章攝其任初左宗

棠佐湖南軍幕。淳保部郎坐樊燮案下。官文鞠訊。簿責頗急。及其罷。宗棠已

授欽差大臣。自福建道湖北。因以官文關防授之。閱時纔九載。世尤歎其

殊遇云。二月李鴻章自徐州移駐周口。東捻犯麻城。掠蘄水。廣濟。黃梅。游騎至宿松。劉秉璋周盛波至太湖。捻還走鄂境。彭毓橘軍次黃州。聞捻至。急進兵迎擊。毓橘本湘軍宿將。新平金陵有功。自負材勇。輕騎覘地勢。至蘄水六神港。遇捻大至。率其部將羅朝雲等直前搏戰。軍中初不知。

陷圍久無援至與道員葛承霖均戰死湘軍久勝之餘輕於犯險致爲賊誤時論惜之三月劉松山擊西捻於郿大破之時張總愚與回匪合其燄益熾松山旣攻破銀渠金渠復有此捷軍勢頗振左宗棠留屯德安請緩赴陝

詔俟援鄂軍至仍卽入關四月東捻掠桐柏信陽周盛波自北迎擊提督劉啟福歿於陣捻南走應山孝感入黃安劉銘傳敗之紫屏捻還走安陸游弋於雲夢應城白口天門閒值天旱湖河盡涸官軍憊甚捻亦飢散宋國永遇於隨州西襲破賊館斬馘數百捻北走新野南陽游騎至鎮

平鄧州捻苦乏食破民寨綑載新麥劉銘傳自襄陽躡之豫軍自南陽進擊捻走唐縣五月捻掠舞葉臨潁遂走許州張曜橫擊之捻北走洧川尉氏中牟時山東梁山土匪使使迎任賴捻晝夜馳數百里五日至鉅野合梁山匪陷戴廟隄牆渡運而東犯泰安登萊青三郡皆震自捻擾鄒中運防士卒久懈天旱水涸竟不能爲一日守

嚴旨切責論者以曾國藩創設運防未嘗有失頗咎李鴻章鴻章移駐歸德

朝廷猶嫌其遠乃駐濟甯劉銘傳獻倒守運河之議移運

東長牆於西岸又議防守膠萊河鴻章從之會劉長佑英  
翰亦言驅賊海隅可收聚殲之效

旨下曾國藩等籌辦東捻走青石關由青州趨登萊六月  
捻自萊陽北趨招遠黃縣全股聚海澨李鴻章丁寶楨會  
軍扼膠萊河以蹙之膠萊河者元至正閒所開新河以通  
漕運而避海道之險者也延袤幾三百里其北口水淺沙  
洳不能築牆西距三十里有濰河入海道乃議從新河西  
築牆接濰河東以達於海令淮軍東軍分段守之而調防  
運軍赴膠萊他軍替運防是時捻已深入海曲咸謂成功

可指日待獨曾國藩憂其難恃貽書鴻章力主倒守運河  
七月捻屢撲膠萊河爲淮軍豫軍所卻改道走濰河東軍  
王心安築壘方成而隄牆未竣捻長驅渡河自安邱臨朐  
南走將由沂莒窺江淮丁寶楨以聞

穆宗怒鴻章交部議寶楨褫職留任先是東軍守濰河本  
潘鼎新汛地潘軍方南移而北路遽失守

詔斬王心安丁寶楨上疏爭辨乃宥心安而切責鴻章鴻  
章仍議防運英翰遣張得勝等率皖軍萬人扼仰化集東  
迄於海曾國荃遣譚仁芳劉維楨等率鄂軍萬二千人扼

勒口至亨濟間劉長佑遣唐訓方張樹聲率直軍五千人扼齊河張秋鴻章復徵浙兵五千扼六塘河其運河中段淮軍東軍分守之東捻南趨贛榆青口折北走鄰城蘭山劉銘傳牛師韓姚廣武屢擊敗之八月李鴻章移駐臺莊捻撲宿遷運河牛師韓等拒卻之復撲老劉淵姚廣武截擊敗之乃北走邳鄉爲潘鼎新所要還走海州漕督張之萬疏論牛師韓姚廣武功請增軍萬五千人英翰亦言宿遷之戰未見淮軍効鴻章觀望丁寶楨復屢疏相詆詔責鴻章忌刻縱賊鴻章疏辨云英翰遠在潁郡繫念運

防派程文炳等出境助勦臣與該撫交好有年何至稍存忌刻縱賊觀望爲此悖義昧良之舉至丁寶楨以灘河前事謂臣徇私諉咎倒置是非仰蒙

聖明詳切訓誡臣敢不懔遵臣與丁寶楨本無嫌怨自夏閒賊入東後彼卽欲逐賊出境固身任地方之常情惟臣專辦勦捻必思所以制賊之方扼膠萊爲上策次則蹙之運河以東無論能否辦到勢固不能不辨臣擬出三大支爲合力兜勦之計但捻逆人馬眾多不能不稍待時日於是鴻章憂悴致疾曾國藩貽書慰勉之九月潘鼎新敗捻

海州劉銘傳復敗之王堰牛山捻自贛橫趨蘭山入嶧縣  
山中溫德勒克西馬隊兜勦捻奔滕縣趨濟甯將撲運防  
值黃水盛漲沈口戴廟巨浸汪洋灌入運河捻不能飛渡  
鴻章回駐濟甯飭諸軍嚴堵下游捻乃走泰安由蒙陰而  
南時郭松林創愈鴻章畀萬人統之號武毅軍十月曾國  
荃乞病以郭柏蔭爲湖北巡撫東捻走淄川長山章邱將  
由齊河渡黃阻水師弗能過東南走濰劉銘傳要擊於松  
樹山大破之捻繞安邱走高密諸城銘傳追及於日照任  
柱耳受槍傷急奔贛榆銘傳旣屢勝捻黨潘貴升獻款請

殺任柱自效銘傳許獎二萬金比至贛榆銘傳自當牛賴  
令善慶當任柱捻皆百戰之餘殊死鬪善慶令騎兵下馬  
結陣以洋槍排擊捻死亡相藉猶進不已天忽大霧銘傳  
令丁壽昌等乘霧繞捻後牛賴兩酋皆遁我軍萃於任首  
潘貴升自後狙殺呼曰任柱槍斃矣捻遂大奔柱原名化  
邦毫人粵逆僞封魯王兇猛善戰張總愚李允皆不及剽  
掠十餘年荼毒數省及其誅遠近稱快餘黨推賴汝光爲  
首而捻勢衰不復振矣潘鼎新追擊賴汝光於海州上莊  
大破之斬捻首任金保降者五百人十一月捻走諸城高

密潘鼎新躡之捻由昌邑北蒙折走濰劉銘傳先至濰捻大驚散走追至壽光俘降四千餘人郭松林要之杞城復敗之於是銘傳松林盡棄輜重裹乾糧與捻相逐捻將沿海南走阻瀨河不能遁乃踞壽光王胡城誓死戰銘傳松林分左右進馬賊數十圍潮至善慶溫德勒克西率馬隊拒之追至鳳凰臺捻步隊猶列十餘里牛喜子率白旗直犯銘傳賴汶光率藍旗分數支犯松林戰良久我軍無不一當十捻大潰壽光民圩皆從壁上觀見官軍勝開圩助殺捻多死於瀨河浮尸二萬餘俘一萬餘人奪獲騾馬二

萬四僞列王徐昌先僞首王范汝增任柱兄任定皆伏誅  
賴汝光率千餘騎鳴水南奔沐陽十二月捻渡六塘河牛  
師韓程文炳俘百餘人劉銘傳郭松林由山東疾馳六百  
里追至清江黃翼升李昭慶追至淮城捻由高寶趨揚州  
吳毓蘭迎擊瓦窑鋪陣俘賴汝光殘黨走六合天長盱眙  
蕩髮而散僞魏王李允逆首牛喜子任三厭詣李世忠降  
賴汝光本粵賊悍黨僞封遵王洪酉誅始變而爲捻與任  
柱相依柱善戰汝光善謀其兇悍視他賊爲甚自書親供  
于餘言述粵賊事甚詳

詔凌遲處死並牛喜子李允任三厭駢誅之東捻平李鴻章疏請休兵籌善後劉銘傳假還諸將爭請解兵歸農而西捻擾畿南京師大震

同治七年正月

詔李鴻章急赴河北會剿先是六年六月左宗棠率師入潼關西捻張總愚渡渭北往來蒲富高渭閒宗棠遣劉松山郭寶昌黃鼎會擊破之七月捻走臨潼三原咸陽劉效忠擊之走興平八月宗棠移駐臨潼捻自興平渡渭而北復由臨涇渡涇而東大雨阻水官軍不能進九月宗棠遣

劉松山等進富平劉典高連陞等進相橋康橋捻由蒲城入北山十月宗棠遣軍敗之洛川捻圍鄜州甘泉不克犯宜川劉松山追至洛川遇回匪大至李祥和戰死捻燄大張陷延州綏德十一月劉松山郭寶昌躡至清澗克綏德捻自宜川渡黃河犯山西連陷吉州鄉甯山西河防故隸按察使陳湜湜初聞捻在綏德注意防葭州及捻渡河湜先至省城白事間報馳至捻已南擾河津逼解州運城穆宗大怒湜與巡撫趙長齡俱得罪

詔張曜宋慶程文炳分道防河北宗棠親率劉松山郭寶

昌等軍入晉克吉州鄉甯解稷山圍十二月松山破捻洪洞捻走平陽自垣曲趨濟源循河至原武犯衛輝宗棠令喜昌全福安住率馬軍偕松山寶昌趨彰德嚮直隸是年正月捻自內黃渡漳大股走平鄉雜澤南和邯鄲順德至定州保定戒嚴神機營偵捻已近易州直隸總督官文奏捻在涇陽驛有

詔詰責並促李鴻章馳赴畿輔左宗棠扼保定以北捻犯雄縣張曜等方至湯陰劉松山至保定李鴻章尙在徐詔切責鴻章李鶴年左宗棠官文俱奪職丁寶楨先至河

閒

溫旨嘉獎捻陷獻縣

詔恭親王會神機營王大臣總京師巡防侍郎李鴻藻請派親王爲大將軍左李爲參贊

詔恭親王節制左李及諸督撫以宗棠總前敵諸軍令侍衛陳國瑞領萬人隸神機營英翰率師入援二月左宗棠師次保定李鴻章至德州劉松山等敗捻獻縣商家林捻走深州博野劉松山郭寶昌躡及敗之捻走安平遇郭松林軍納降數百人捻走深澤劉松山郭寶昌會張曜宋慶

夾擊破之。捻還走饒陽深州。郭寶昌誅其首張和尙、張五孩。捻走肅甯。程文炳追及於博野。拔難民數千人。捻自晉州渡滹沱。劉松山、張曜、郭寶昌等追至河干。捻之未渡者殲焉。時援師大集。晝夜與捻馳逐。迄不得要領。捻一人挾數馬避兵疾行。李鴻章乃議驅之太行黃河閒。而李鶴年奮請任攻戰。均無效。三月。捻渡漳。走清化。伐木爲矛。張曜等追之。捻走封邱。郭寶昌迎戰不利。被二創。提督周盈瑞敗歿。遂走滑。破唐仁廉軍。提督陳振邦中矛死。左宗棠親督喜昌、馬德順等擊於滑。敗之。捻自南樂、清豐走莘、趨東。

昌郭松林要擊於茌平俘數十人。捻自平原走陵縣吳橋。四月乘雨至東光。將渡運河。追軍改走南皮。遂至天津。道靜海鹽山入山東掠陽信海豐。恭親王奏蹙賊海隅。限一月平捻。李鴻章復議防北運河。丁寶楨英翰會東昌議分守汎地。自臨清至魏家灣六十餘里。皖軍駐防自東昌南至張秋九十餘里。淮軍駐防諸軍分段修牆。時漳衛盛漸導之減河。自運達黃戰艦通行無阻。

詔徵劉銘傳赴營。捻南掠平原高唐。走清平博平。窺渡運河。值黃水入運折而東南。淮軍東軍築隄牆成。左宗棠至

鹽山以防軍足恃還駐吳橋閏四月劉松山張曜追捻至慶雲滄州其酋高老步等率數百人降捻自泊頭撲運河松山與水師丁長春夾擊走之捻至連鎮吳橋聞左宗棠駐守折走平原高唐茌平陳國瑞連擊破之

朝廷以平捻限滿增

命都興阿管神機營

授爲欽差大臣率春壽馬隊並張曜宋慶陳國瑞等軍均歸調遣捻走武定掠海豐陳國瑞追擊敗之五月左宗棠令劉松山息兵運東甫數日捻騎已近海豐松山喜昌自

鹽山橫出截之。捻不及陣，狂走滄州。張曜自南夾擊，大敗之。捻奔陵縣臨邑。先是李鴻章遣郭松林、潘鼎新、周盛波、王心安等自臨邑築牆，屬之馬頰河，空出西南河濱，餌捻。至是張曜、宋慶追至臨邑，捻不肯深入，走濟陽。鴻章知計不售，乃遣諸軍兜剿。張曜、宋慶趨武定，郭松林、潘鼎新、王心安守隄牆，周盛波駐吳橋甯津。捻走海豐，張曜等遇於濱州，大敗之。乃走陽信。郭松林、王心安進至樂陵，捻自陽信還奔海豐。郭松林、唐仁廉、春壽追擊敗之，乃出甯津，吳橋間，西南馳百五十里，至德州。左宗棠自連鎮親督軍追

之與郭松林馬步相繼。捻不得喘息。是役諸軍追勦歷十  
六晝夜。斬馘無算。捻益不支。六月。郭松林潘鼎新擊捻於  
沙河。大破之。俘斬四千。張總愚中槍落馬。數十騎翼之逃。  
時大雨平陸。劉松山等軍爲積水所阻。張曜等駐臨邑。捻  
走甯津西南。松山令軍士避淖而行。追至吳橋。俘斬二千。  
羣捻多降。初。曾國藩檄黃翼升歐陽利見姚廣武各率所  
部礮船自張秋渡黃龍神見舟中水忽大漲乘流進口入  
德州。於是運防益固。劉銘傳至德州謁鴻章。聞各軍大捷。  
不肯攘功。力辭兵事。鴻章仍令率舊部赴前敵。捻自湘軍

擊敗後走德平。郭松林、潘鼎新、陳國瑞、張得勝等追師集商河。張總愚涉水走西南，至高唐。鼎新追及，乃嚮博平清平，圖撲運防時東昌臨清。張秋閑河水深，馬頰河黃水漫入，各營嚴守。捻不得近，乃由博平向東昌迤南犯河牆，守軍卻之。銘傳等乃議守徒駭河。銘傳由桃橋守至南鎮，松林由桃橋守至博平。袁保恆、張曜、宋慶由博平守至東昌，圈捻於黃連徒駭之間。是時水溜泥濪，捻無所掠，食部黨解散數萬眾不知所之。松林、銘傳馬隊五六千縱橫要擊，斬數千人。張總愚率數十騎北遁，馬勇及之，乃棄馬入禾

叢久之不得脫總愚赴水死獲其子張葵兒其從子張正江走南鎮銘傳追獲之俘老捻四千人餘匪悉爲善慶溫德勒克西所殲西捻平李鴻章協辦大學士與左宗棠並晉太子太保劉銘傳封一等男其餘將帥給獎有差

王定安曰三代時中夏無騎兵行軍皆以車戰至戰國始知用騎其風蓋昉自北漠當時諸侯王封域千里縱敵近世一行省輒稱鐵騎數十萬縱橫馳突或數日卽至人國都於是三晉燕齊皆築長城自衛其見於短長策者可攷也秦并天下中國無盜警乃築萬里長城限胡騎由斯言

之牆塹之足以拒馬由來久矣自愾之盛悍騎何啻五六  
萬僧王率蒙古精騎追之常落其後曾公國藩奉  
命北征初亦苦無馬屢使使出口購之馬之至者無多而  
寇日以盛始變計築長牆守運河暨沙魯諸河聞者皆笑  
其迂其後李公鴻章踵而行之更守膠萊北運河及馬頰  
徒駭遂歲厥功夫築牆千里合數省兵力守之寇至或不  
能保亦計之至拙者也然天下之至巧非至拙者不能勝  
堅守其拙而巧者靡矣今西洋之船堅礮利固無敵其所  
謂鐵甲船者礮火不能傷風濤不能撼固天下之至巧者

矣然而遇沙灘則停觸礁石則漏夫沙石亦物之至冥頑無知者也而鐵甲船畏之則知拙之足以制巧斷斷然矣余昔從曾公遊有

詔詢西夷和戰事公曰夷可與戰乎余對曰可公問何恃對曰某不知其何恃然觀公所部七萬人皆用西洋槍礮中國利器無出其右者而屢挫於捻捻僅用長矛二丈飛騰入陣槍礮不得再施知捻之可以勝官軍則知西夷之可以戰也公初疑其辯已而曰子之言是也勝負在人不在器然安得二三孟浪不畏死者爲余前驅哉

湘軍記

卷十六

三

湘軍記卷十六

武昌范德培校字